

古今圖書集成

職方典

五

卅五

卷

職方典第五百三十五卷

漢中府部藝文二

詩

玩漢水

梁簡文帝

離色崑崙水泓澄龍首渠豈若茲川麗清流疾且徐離離細

一作砂

磧淨藹藹樹陰疎石衣隨溜卷水

芝扶浪舒連翩瀉去櫂鏡澈倒遙虛卿持點纓上於是察淵魚

飛僊閣

唐杜甫

土門山行窄微徑緣秋毫棧雲闌干峻梯石結構牢萬壑欹疏林積陰帶奔濤寒日外淡泊長風中
怒號歇鞍在地底始覺所歷高去來雜坐臥人馬同疲勞浮生有定分饑飽豈可逃歎息謂妻子我
何隨汝曹

五盤

前人

五盤雖云險山色佳有餘仰凌棧道細俯映江流疏地僻無網罟水清反多魚好鳥不妄飛野人半
巢居喜見淳朴俗坦然心神舒衷郊尚格鬪巨猾何時除故鄉有弟妹流落隨江墟成都萬事好豈

若歸吾廬

龍門閣

前人

清江下龍門絕壁無尺土長風駕高浪浩浩自太古途危中縈盤仰望垂綫縷滑石敲誰鑿浮梁易相挂目眩隕雜花頭風吹過雨百年不敢料一墜那得取飽聞經瞿塘足見度大庾終身歷艱險恐懼從此數

石櫃閣

前人

季冬日已長山晚半天赤蜀道多早花江間遶奇石石櫃層波上臨虛蕩高壁清暉迴羣鷗暝色帶遠客羈栖負幽意感嘆向絕跡信甘孱懦嬰不獨凍餒迫優游謝康樂放浪陶彭澤吾衰未自由謝爾性有適

武侯祠

前人

諸葛大名垂宇宙宗臣遺像肅清高三分割據紆籌策萬里雲霄一羽毛伯仲之間見伊呂指揮若定失蕭曹運移漢祚終難復志決身殲軍務勞

八陣圖

前人

功蓋三分國名成八陣圖江流石不轉遺恨失吞吳

武侯廟

前人

遺廟丹青落空山草木長猶聞辭後主不復臥南陽

駱谷行

岑參

聞君行路難惆悵臨長衢豈不憚艱險王程剩相拘憶昨蓬萊宮新授刺史符明主仍賜衣價直千金餘何幸承命日得與夫子俱攜手出華省連鑣赴長途五馬當路嘶按節投蜀都千崖信縈折一徑何盤紆層冰滑征輪密竹礙隼旟深林迷昏旦棧道凌空虛飛雪縮馬毛烈風擘我膚峯巒望天小亭午見日初夜宿月近人朝行雲滿車泉澆石罅坼火入松心枯亞尹同心者風流賢大夫榮祿上及親之官隨板輿高價振臺閣清詞出應徐成都春酒香且用俸錢沽浮名何足道海上堪乘桴

與鮮于庶子自褒城同行作

前人

剖竹向西蜀岷嶴渺天涯空深北闕戀豈憚南路賒前日登七盤曠然見三巴漢水出嶓冢梁山控

褒斜棧道籠迅湍行人貫層崖巖傾劣通馬石窄難容車深林怯魍魅洞穴防龍蛇水種新插秧山田正燒畬夜猿嘯山雨曙鳥鳴江花過午方始飯經時旋及瓜數公各遊宦千里皆辭家言笑忘羈旅還如在京華

永安超禪師房

前人

滿樹枇杷冬著花老僧相見具袈裟漢王城北雪初霽韓信壇西日欲斜門外不須催五馬林中且聽演三車豈料巴川多勝事爲君道此報京華

石臼嶺

歐陽詹

鳥合蛇盤地半天下窺千仞到浮煙因高回望霑恩處認得梁州落日邊

漢江

杜牧

溶溶漾漾白鷗飛綠盡春深好染衣南去北來人自老夕陽長送釣船歸

西歸出斜谷

雍陶

行過險棧出褒斜出盡平川似到家無限客愁今日徹馬頭初見米糲花

武侯廟

元稹

撥亂扶危主，慙慙受托孤。
英才過管樂，妙策勝孫吳。
凛凛出師表，堂堂八陣圖。
如公全盛德，應歎古今無。

褒城驛

前人

嚴秦修此驛，水漲驛前池。
已種萬竿竹，又栽千樹梨。
四年三月半，新筍晚花時。
悵望東山去，等閒題作詩。

過駱谷

白居易

今年到時夏雲白，去年來時秋樹紅。
兩度見山心，有愧皆因王事到山中。

黃花驛

薛逢

孤戍迢迢蜀路長，鳥鳴山館客思鄉。
更看絕頂煙霞外，村樹巖花照夕陽。

送人赴任襄中

羅隱

萬轉江山通蜀國，兩行珠翠見褒人。
海棠花謝東風老，應念東都共苦辛。

醴泉院

後唐和凝

萬山嵐靄簇洋城數處禪齋儘有名古柏八株惟翠色靈泉一派逗寒聲暫遊頗愛閒滋味久住翻嫌俗性情珍重支公每相勉我於儒行也修行

洋川

宋韓億

梁州鄰左古洋川氣候融融別是天地僻過冬稀見鴈簪深初夏已聞蟬鄉風與蜀微相似驛路兼秦舊接連駱谷轉山圍境內漢江奔浪遠城邊展開步障繁花地畫出棊枰早稻田遠寺徑危攢迸筍後園池冷漱飛泉秋深滿院芭蕉雨晚色臨軒薜荔煙南浦揭蒲葦漂冽西溪踏石向暄妍夕陽道觀鳴鐘鼓夜月人家奏管絃楊柳影中沽酒市芰荷香裏釣魚船珍禽聽久聲難辨新果嘗餘味更全野渡潮平分淺瀨郡樓雲散露高巔喧闐鼓吹迎神社狼藉杯盤送客筵慈竹清筠霜鬪鳳海棠堆艷火爭然蒼崖嶮峻應藏虎碧洞陰深恐隱僊妓女從遊持翠蓋士流尋勝擘香箋戚姬廟宇青蕪沒和相詩碑綠蘚沿三縣俗淳宜靜理兩衙事簡可閒眠紛華度歲他鄉外幽趣終朝在眼前不爲近頒明詔下及瓜情願滿三年

崇法院

韓續

久聞雲際山中有古招提新秋喜遠覽銳意窮攀躋出郭值微雨涼風曉萋萋陂陀越大嶺沙路春
無泥野沃稻田秀耒耜沿溝畦登岑復入谷漸過西山西舉首望華屋雙岸鬱相攜虛橋駕烟靄峻
闌排虹霓下馬踏危級褰裳陟修梯超然層閣外仰視穹蒼低俯眺亦何有森森喬木齊喧囂從吏
語嘲哂驚禽啼既飯復搜討林間得幽蹊巖阿訪靈跡大士常高棲古殿蝕苔蘚丹青暗壁壁俯身
踐危蹬側足緣深溪老樹陰潭黑風條亂蟬嘶懸泉洗陰壁瑩色如玻璃佳觀誠可戀遲留思顛擠
捫蘿出天險始免魂神睽緩步凌巖嶮雙旌隨杖藜回瞻花雨地已被烟雲迷頓轡下平陸晴川留
馬蹄新篁映碧宇野寺臨長堤乘倦駐歸策荒園步柔荑婆娑兩高樹磊落垂紅梨汲井漱甘液拂
塵觀舊題出門尙斜日隱隱聞城聲勝槩亦陳迹茫然失端倪爲詩記髣髴社友無訶詆

東山寺

前人

久有東林約因乘日暇遊眼明初出谷神旺欲凌秋野曠竊孤隼江清颺遠鷗近山青障合多稼綠
雲浮鷄犬村相接溝塍水亂流度橋喧從騎環樹獨鳴騶問俗經堯壤尋僧到沃州深沉開寶闥磅

櫺窗華輦像設嚴珠殿經聲隱絳幃仰看香刹直徐步畫廊修遇物皆周覽逢軒卽少留前庭初顯豁後徑轉深幽野嶺青筠散霜楓赤葉稠隔牆聞好鳥循沼翫遊鯈翠榦樓初剝紅芒稻半收凌虛發陞道匝境對層樓暗谷藏危棧平沙際別州川原同聚沫身世劇浮漚回首飄鄉思臨樽浣客愁清閒資善奕決勝在冥搜影轉稊莖表風生曲逆籌歸鞍不敢緩斜日照文楸

遊賈氏南園

前人

江堤楊柳碧毵毵閒訪名園郡郭南塋麥生齊知雨足海棠開遍覺春酣門前幽徑通芳蕙竹裏虛亭對遠風風物有情應笑我不攜歌酒只清談

遊靈巖

鮮于侁

千峯環郡宇二水遶城堞每憐山水佳況復開巖穴川流數里近放棹攀巖岨靈巖駭神化環蔭數畝闊何人營佛祠棟宇殆天設前軒瞰谿山眺聽心耳豁徑穿巨水下碧玉聳高節涓流瀉石罅玉乳甘且潔其東乃小巖洞戶敞深徹嵌巖見石柱任重立精鐵昔人遇真仙相攜觀金闕川平聽鷄犬始覺人世別屈曲沿清谿桃花正開發塵緣念鄉縣歸思若眩涉寤寐瞬息間巖扉已巖鑄時遷

等陵谷事勝存圖牒獨有滄江流青霄見明月予來秋之季氣象頗淒切草木自變衰山花常發活
清暉沃賞適異景差勝絕薄暮上歸舳依然望林樾

望雲樓

前人

雲山日在眼飛觀復看雲願似崇朝雨飄揚靜世氛

灋泉亭

前人

泉聲如琮琤泉水深浩渺可愛主人心亭中狎鷗鳥

無言亭

前人

物來言有應事去言自忘翛然一榻上聊可傲羲皇

禊亭

前人

流水灣還來羽觴酬酢競應有蘭亭篇邦人起歌詠

野人廬

前人

深深惟使君草草學田舍持此歸與心隨時自瀟灑

茶藤洞

前人

天香分外清玉色無柰白誰向瑤池遊依稀太真色

南園

前人

城上望南園園深知幾許啼鳥聞聞關遊人不知處

北園

前人

朝陽動湖水春色入名園邑人千萬戶日日望朱幡

冰池

前人

東西橫塘裏積疊崑嶺玉潛鱗知幾何還待春風觸

書軒

前人

朱門謝俗客幽齋叙友人澄瀾鑑止水高節看叢筠

披錦亭

前人

春歸閨風家功入大匠手能將五色雲點綴當戶牖

橫湖

前人

三冬修竹色六月芙蓉風軒聽復敗處盡入菱花中

湖橋

前人

千峯起華陽一水連天漢初月正沉鉤陰然飛兩岸

待月臺

前人

臺高上霄漢人遠接巒紛秋中夜靜萬里無纖雲

吏隱亭

前人

心休忘物我道勝一軒靜隱几度朝晡可嗟人畏影

霜筠亭

前人

亭小竹更密林幽人不知能教三伏景變作九秋時

露香亭

前人

葉上花露泣軒前紅日長遊風復誰爲時送席間香

涵虛亭

前人

危欄試睡聽空翠如何把悄悄憂世心臨風一傾寫

過溪亭

前人

溪橋入庭下杖履可忘憂誰識釣魚翁有時拋直鉤

菡萏亭

前人

夏綠分照水秋香仍滿池吳宮誰教戰一一盡妖姬

此君庵

前人

結庵已忘情植竹更端操迢遙月上牀習靜誰能造

金橙徑

前人

遠分纓下美移植使君園何人爲修貢佳味上雕盤

竹塢

前人

幽蹊入疎篁翠色連遠塢清夜天風來不隔鸞鳳語

荻浦

前人

凝霜壓寒蘆白月鋪淨練誰起落梅聲愁人淚如霰

蓼嶼

前人

盈杖紅欲滴照水色更好登臨正感秋何用催秋老

寒蘆港

前人

兼葭何紛披湖水還詰曲誰言江渚間亦有雙鸞宿

天漢臺

前人

臺外遶佳山臺中垂暇日齷齪絳守居徒勞誇紹述

溪光亭

前人

湖源深可醺溪水清能照坐見落花來不知春色老

簣營谷

前人

暉暉藍田山山下多綠玉安得結茅茨林間許容足

古今圖書集成
庚子八月八日再遊東山寺

前人

蜀師當日戍黃金此地由來險阻深
漢水東流自紆直秦山北望正嶽崑
涼風肅物初秋意膏澤愆期但晝陰
同是天涯未歸客荒烟斜日正登臨

贈牛頭寺明上人

蘇軾

一轉金剛一炷香雪眉霜鬢任蒼蒼
去傳熊耳西來印歸葺牛頭舊住房
風靜水聲喧竹塢夜深雲氣濕龍牀
迷途盡欲師開悟何事年來厭玉堂

冰池

前人

不嫌冰雪遶池看誰似詩人巧耐寒
記取羲之洗硯處碧琉璃下黑蛟蟠

書軒

前人

雨昏石硯寒雲色風動牙籤亂葉聲
庭下已生書帶草使君疑是鄭康成

披錦亭

前人

煙紅霞綠曉風香燕舞鶯啼春日長
誰道使君貧且老繡屏錦幃咽笙簧

橫湖

前人

貪看翠蓋擁紅粧，不覺湖邊一夜霜。
卷却天機雲錦段，從教匹練瀉秋光。

湖橋

前人

朱欄畫柱照湖明，白葛烏紗曳履行。
橋下龜魚晚無數，識君拄杖過橋聲。

望雲樓

前人

陰晴朝暮幾回新，已向虛空寄此身。
出本無心歸亦好，白雲還似望雲人。

待月臺

前人

月與高人本有期，掛簷低戶映蛾眉。
只從昨夜十分滿，漸覺冰輪出海遲。

二樂榭

前人

此間真趣豈容談，二樂并君已是三。
仁智更須訶妄見，坐令魯叟作瞿曇。

灤泉亭

前人

聞道池亭勝兩川，應瀆爛醉答雲烟。
勸君多揀長腰米，消破亭中萬斛泉。

吏隱亭

前人

縱橫憂患滿人間，頗怪先生日日閒。
昨夜春風眠北牖，朝來爽氣在西山。

霜筠亭

前人

解籜新篁不自持，嬋娟已有歲寒姿。
要看凜凜霜前意，須待秋深粉落時。

無言亭

前人

愚慙稽首維摩詰，敢問如何是法門。
彈指未終千偈了，向人還道本無言。

露香亭

前人

亭下佳人錦繡衣，滿身纓絡綴明璣。
晚香消歇無尋處，花已飄零露已晞。

涵虛亭

前人

水軒花榭兩爭妍，秋日春風各自偏。
惟有此亭無一物，坐觀萬景得天全。

過溪亭

前人

身輕步穩去忘歸，四柱亭前野芍微。
忽悟過溪還一笑，水禽驚落翠毛衣。